



Broj: 01/5-50-1-5-28/08  
Sarajevo, 29.1.2009.godine

**Z A P I S N I K**  
**28. sjednice Komisije za saobraćaj i komunikacije,**  
**održane 29.1. 2009. godine**

Sjednica je održana 29.1.2009., s početkom u 10,20 sati.

Sjednici su prisustvovali članovi Komisije: Branko Dokić, Šemsudin Mehmedović, Husein Nanić, Selim Bešliagić, Sadik Bahtić i Mehmed Suljkanović.  
Opravdano su odsustvovali Savo Erić i Slavko Matić.

Iz Ministarstva komunikacija i prometa BiH sjednici su prisustvovali: Veselin Poljašević, zamjenik ministra, Božidar Škravan, savjetnik ministra, Kojo Koprivica, pomoćnik ministra, Namik Kupusović, koordinator u jedinici za implementaciju projekta Koridor Vc, i Milanka Sudžum, šef Odsjeka za komunikacije. Iz Radiotelevizije BiH sjednici je prisustvovao Nikola Deretić, predsjedavajući Upravnog odbora. Sjednici je prisustvovao i sekretar Komisije za saobraćaj i komunikacije Ahmed Jalovičić.

Sjednicom je predsjedavao Branko Dokić, predsjedavajući Komisije.

Za sjednicu je predložen sljedeći

**D N E V N I R E D**

1. Usvajanje Zapisnika 27. sjednice Komisije;
2. Prijedlog zakona o dopuni Zakona o javnom radiotelevizijskom sistemu BiH, predlagač: Vijeće ministara BiH (druga komisijska faza);
3. Izvještaj Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti;
4. Izvještaj o radu i poslovanju Radiotelevizije Bosne i Hercegovine u 2007. godini;
5. Tekuća pitanja.

Dnevni red usvojen je jednoglasno.

**Ad. 1. Usvajanje Zapisnika 27. sjednice Komisije**

Zapisnik 27. sjednice usvojen je jednoglasno, bez primjedbi.

**Ad. 2. Prijedlog zakona o dopuni Zakona o Javnom radiotelevizijskom sistemu BiH,**  
**predlagač: Vijeće ministara BiH (druga komisijska faza)**

**Branko Dokić** pozvao je predstavnike Ministarstva komunikacija i prometa BiH da daju uvodnu riječ o Prijedlogu zakona o dopuni Zakona o Javnom radiotelevizijskom sistemu BiH (u daljnjem tekstu: Prijedlog zakona).

**Veselin Poljašević** ukazao je da je Prijedlog zakona predvidio da se domaćinstva, odnosno vlasnici radiotelevizijskih prijemnika čiji je najmanje jedan član domaćinstva lice koje je trajno izgubilo vid oslobode plaćanja RTV takse, da Upravni odbor Javnog RTV sistema BiH ne podržava usvajanje ovog zakona, te da je na poslanicima da odluče da li će podržati ovakav prijedlog zakona.

**Selim Bešliagić** pitao je da li Ministarstvo komunikacija i prometa BiH (u daljnjem tekstu: Ministarstvo) raspolaže podacima koji je to broj domaćinstava koje bi ovim prijedlogom zakona bio oslobođen plaćanja RTV takse i koliki bi to bio finansijski gubitak za javne operatere. Mišljenja je da bi oslobađanje plaćanja RTV takse za pojedine kategorije stanovništva trebalo riješiti socijalnim programom na nivou entiteta i Brčko Distrikta BiH.

**Veselin Poljašević** odgovorio je da ni Ministarstvo ni Radiotelevizija Bosne i Hercegovine (u daljnjem tekstu: BHRT) nemaju egzaktno podatke o broju ovih lica, te da se procjenjuje da u Bosni i Hercegovini ima pet hiljada slijepih i pet hiljada gluhih lica.

**Husein Nanić** smatra da ovom pitanju treba pristupiti odgovorno, naročito uzimajući u obzir teško finansijsko stanje BHRT-a, te da bi trebalo utvrditi da li postaje finansijska sredstva u budžetima za subvenciju ove kategorije stanovništva.

**Branko Dokić** je mišljenja da postoji dosta argumenata da se prihvati ovaj prijedlog zakona, ali da s druge strane ima dilemu pošto se BHRT nalazi u veoma teškoj situaciji. Poznato je da ne postoji saglasnost da se BHRT-u pomogne finansijskim sredstavima iz budžeta institucija BiH, pa bi bilo potrebno provjeriti da li postoji mogućnost da se kroz neki socijalni program na nivou entiteta pokuša naći rješenje.

**Nikola Deretić** istakao je da se Upravni odbor Javnog RTV sistema BiH u novembru 2008. godine obratio Vijeću ministara BiH s molbom da se ozbiljno ramotre posljedice usvajanje ovakvog prijedloga zakona. Podsjetio da je Zakonom o Javnom RTV sistemu BiH propisano da niko ne može biti oslobođen plaćanja RTV takse, kao i da je Vijeće ministara BiH odlučilo da neće plaćati troškove satelitskog programa BHRT-a i da zbog toga BHRT ima gubitak od 50 hiljada eura mjesečno.

**Sadik Bahtić** istakao je da će podržati i Prijedlog zakona i amandman koji je uložio poslanik Sefer Halilović, kojim se oslobađanje od plaćanja RTV takse odnosi i na gluha lica. Predlaže da Komisija usvoji zaključak kojim se podržava povećanje RTV takse, čime bi se omogućila naknada troškova za oslobađanje plaćanje RTV takse za određene kategorije stanovništva.

**Šemsudim Mehmedović** smatra da treba ozbiljno razmotriti finansijske posljedice za Javni RTV sistem BiH, ukoliko se odobri oslobađanje od plaćanja RTV takse za određene kategorije stanovništva. Ukazao je da se može amandmanski djelovati i na samoj sjednici Komisije i predložio da se od obaveze plaćanje RTV takse oslobađaju samo vlasnici radiotelevizijskih prijemnika koji su trajno izgubili vid i žive sami u domaćinstvu ili sa starateljem.

**Husein Nanić** smatra da je Vijeće ministara BiH kao predlagač ovog prijedloga zakona dužno u budžetu institucija Bosne i Hercegovine osigurati sredstva u visini iznosa umanjenih prihoda Javnog RTV sistema BiH nastalih zbog oslobađanja plaćanja RTV takse za određene kategorije stanovništva.

U raspravi su još učestvovali Mehmed Suljkanović i Božidar Škravan.

Uzmajući u obzir nove aspekte, Komisija je raspravi, u skladu s članom 109. stav (3) tačka a) Poslovnika Predstavničkog doma, razmatrala i jedan novi amandman koji glasi .

#### **Amandman I.**

U članu 1. stav (1) mijenja se i glasi:

(1) “Od obaveze plaćanje RTV takse iz člana 17. stav (1) ovog zakona oslobađaju se vlasnici prijemnika koji su trajno izgubili vid i žive sami u domaćinstvu ili sa starateljem”.

U istom članu iza stava (2) dodaje se novi stav (3) koji glasi:

(3) Vijeće ministara BiH dužno je u budžetu institucija Bosne i Hercegovine osigurati sredstva u visini iznosa umanjenih prihoda Javnog RTV sistema BiH nastalih zbog oslobađanja od plaćanja RTV takse vlasnika prijemnika iz stava (1) ovog člana. Sredstva za naknadu prihoda Javnom RTV sistemu BiH uplaćivat će se na jedinstveni račun u skladu s članom 23. stav (1) ovog zakona.

Komisija je, s pet glasova „za“ i jednim „protiv“, usvojila amandman.

Komisija, s pet glasova „protiv“ i jednim „za“, nije usvojila sljedeća dva amandmana poslanika Sefera Halilovića, koji glase:

#### **AMANDMAN I.**

U predloženom članu 17a. u nazivu člana iza riječi slijepa dodaju se riječi: „i gluha“.

#### **AMANDMAN II.**

U predloženom članu 17a. stav (1) iza riječi vid briše se tačka i dodaju se riječi: „ili sluh“

Komisija je, s pet glasova „za“ i jednim „protiv“, prihvatila tekst Prijedloga zakona sa usvojenim amandmanom, te predlaže Predstavničkom domu da usvoji Prijedlog zakona o dopuni Zakona o Javnom radiotelevizijskom sistemu BiH.

Komisija, s tri glasa „protiv“, dva “suzdržana” i jednim „za“, nije usvojila prijedlog zaključka Sadika Bahtića kojim se podržava povećanje RTV takse, čime bi se omogućila naknada troškova za oslobađanje plaćanje RTV takse za određene kategorije stanovništva.

U smislu odredbi člana 113. Poslovnika Predstavničkog doma doma Parlamentarne skupštine BiH, za izvjestioca u plenarnoj fazi imenovan je prvi zamjenik predsjedavajućeg Komisije Šemsudin Mehmedović.

### **Ad. 3. Izvještaj Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti**

**Branko Dokić** pozvao je predstavnike Ministarstva komunikacija i prometa BiH da daju uvodnu riječ o Izvještaju Vijeća ministara BiH o aktivnostima na projektu „Autoput na Koridoru Vc“ i Plan narednih aktivnosti ( u daljnjem tekstu: Izvještaj).

**Namik Kupusović** istakao je da je se Izvještaj odnosi na period do juna 2008. godine, te je stoga Komisiji dostavljena Dopuna izvještaja za period juli-decembar 2008. godine. Autoput na Koridoru Vc (u daljnjem tekstu: Koridor Vc) najveći je projekat transportne infrastrukture u Bosni i Hercegovini i jedan od najvažnijih u jugoistočnoj Evropi. Koridor Vc je ogranak panevropskog Koridora Vc koji spaja Budimpeštu s Lukom Ploče. Dužina Koridora Vc kroz Bosnu i Hercegovinu je 336 km, od čega je 45 km izgrađeno ili je u izgradnji (dionica Kakanj-Vlakovo). Studijom izvodljivosti predviđeno je da se 191 km Koridora Vc izgradi do kraja 2012. godine, a preostalih 145 km do kraja 2017. godine. Institucije Bosne i Hercegovine osigurale su finansijska sredstva za izradu planersko-studijske i projektne dokumentacije za Koridor Vc. Ekspertni timovi Republike Hrvatske i Bosne i Hercegovine pripremili su nacrt Sporazuma između Vijeća ministara BiH i Vlade Republike Hrvatske o izgradnji međudržavnog mosta na rijeci Savi kod Svilaja i planirano je da se sredstva za izgradnju ovog mosta osiguraju iz sredstava GSM licence. U 2008. godini Bosna i Hercegovina potpisala je četiri kreditna sporazuma s međunarodnim bankama za finansiranje

izgradnje Koridora Vc u iznosu od 480 miliona eura. Postoji više uslova koje institucije Bosne i Hercegovine moraju ispuniti da bi sredstva iz ovih kreditnih sporazuma bila operativana, prije svega potrebno je da se usvoji i primjenjuje odluka o naknadi iz goriva u iznosu ne manjem od 0.05 eura po litru namijenjenoj za razvoj mreža autoputeva i da se postigne dogovor o raspodjeli tih sredstava. Također je neophodno da se imenuje nazorni odbor za praćenje provođenja Projekta Koridor Vc, te da se do kraja 2009. godine Direkcija za autoceste Federacije BiH registrira kao javno preduzeće.

**Selim Bešliagić** ukazao je da je izgradnja Koridora Vc trebalo da bude državni projekat, ali da se uloga države svela samo na koordinaciju, mada podržava bilo kakve aktivnosti na realizaciji ovako važnog projekta za Bosnu i Hercegovinu.

**Branko Dokić** istakao je da Bosna i Hercegovina ima najniža izdvajanja iz cijene goriva u Evropi i da je u 2005. godine Vijeće ministara BiH usvojilo dokument o harmonizaciji izdvajanja sredstava za autoputeve i brze puteve iz cijene tečnih goriva, pa bi trebalo tražiti informaciju o realizaciji ovog dokumenta. Smatra da je neprihvatljivo da Koridor Vc ne završava u Luci Ploče, jer bi se na taj način Bosna i Hercegovina odrekla korištenja Luke Ploče, čiju je infrastrukturu izgradila.

**Šemsudin Mehmedović** istakao je da mu je nejasna situacija u vezi sa spajanjem Jadranske magistrale s Koridorom Vc, kao i način rješavanja pitanja izgradnje mosta kod Počitelja. Ukoliko se pristane na sada predloženu trasu, smatra da je to nepovoljno u ekonomskom smislu za Bosnu i Hercegovinu, jer ćemo u tom slučaju morati finansirati i izgradnju dionice Jadranske magistrale kroz istočnu Hercegovinu.

**Mehmed Suljkanović** ukazao je na činjenicu da se izgradnja pojedinih dionica Koridora Vc u Federaciji BiH planira realizirati putem javnog-privatnog partnerstva, a pošto Federacija BiH kasni s donošenjem propisa iz ove oblasti, postavlja se pitanje u kojoj će mjeri to usporiti planirane aktivnosti.

**Husein Nanić** predložio je da Komisija usvoji zaključak u kojem se od Vijeća ministara BiH traži da Predstavničkom domu Parlamentarne skupštine BiH dostavi mapu trase autoputa Koridor Vc.

Nakon opće rasprave, Komisija za saobraćaj i komunikacije jednoglasno je podržala Izvještaj i predlaže Predstavničkom domu da usvoji Izvještaj o aktivnostima na projektu „Autoput na Koridoru Vc“ i Plan narednih aktivnosti.

Također, Komisija je u raspravi o Izvještaju usvojila zaključke koje upućuje Predstavničkom domu na usvajanje:

1. Traži se od Vijeća ministara BiH da Predstavničkom domu Parlamentarne skupštine BiH dostavi mapu trase Autoputa Koridor Vc.
2. Potrebno je da Vijeće ministara BiH obavijesti Predstavnički dom Parlamentarne skupštine BiH kakve reperkusije na položaj trase autoputa Koridor Vc ima podnošenje prijedloga Republike Hrvatske da se delta Neretve na teritoriji Hrvatske proglasi zaštićenim područjem, u smislu zaštite okoliša.
3. Traži se od Vijeća ministara BiH da Predstavničkom domu Parlamentarne skupštine BiH dostavi informaciju o realizaciji dokumenta o usklađivanju izdvajanja sredstava za autoputeve i brze puteve iz cijene tečnih goriva.

U smislu odredbi člana 113. Poslovnika Predstavničkog doma doma Parlamentarne skupštine BiH, za izvjestioca u plenarnoj fazi imenovan je prvi zamjenik predsjedavajućeg Komisije Šemsudin Mehmedović.

#### **Ad. 4. Izvještaj o radu i poslovanju Radiotelevizije Bosne i Hercegovine u 2007. godini**

**Branko Dokić** pozvao je predstavnika Radiotelevizije Bosne i Hercegovine da da uvodnu riječ o Izvještaju o radu i poslovanju Radiotelevizije Bosne i Hercegovine u 2007. godini (u daljnjem tekstu: Izvještaj).

**Nikola Deretić** istakao je da Upravni odbor Radiotelevizije Bosne i Hercegovine ( u daljnjem tekstu: BHRT) nije usvojio Izvještaj koji je sačinilo poslovodstvo BHRT-a, jer je nerealno prikazano stanje u BHRT-u, što je i potvrđeno revizorskom izvještajem za 2007. godinu. Smatra da je prikriveni gubitak BHRT-a veći od 9,7 miliona KM, jer su revizori u svom izvještaju naveli da nisu mogli utvrditi stvarni iznos duga. Ukazao je da je trenutno stanje u BHRT- izuzetno teško, uprkos činjenici da je povećan stepen naplate RTV takse na 67%, ali da ni to nije dovoljno za konsolidaciju BHRT-a.

U raspravi su još učestvovali: Šemsudin Mehmedović, Branko Dokić, Selim Bešagić, Husein Nanić, Mehmed Suljkanović i Sadik Bahtić.

Nakon rasprave, Komisija je jednoglasno usvojila sljedeći zaključak:

S obzirom da je Predstavnički dom na 41. sjednici razmatrao i usvojio revizorski izvještaj o poslovanju BHRT-a za 2007. godinu, Komisija je odlučila da se ne opredjeljuje preme Izvještaju i primila k znanju Izvještaj o radu i poslovanju Radio-televizije Bosne i Hercegovine za 2007. godinu.

Također, Komisija je u raspravi o Izvještaju jednoglasno usvojila zaključak koji upućuje Predstavničkom domu na usvajanje:

Predstavnički dom Parlamentarne skupštine BiH traži od Upravnog odbora BHRT-a da u što kraćem roku dostavi Parlamentarnoj skupštini BiH izvještaj o radu i poslovanju BHRT-a u 2008. godini i plan mjera za prevazilaženje trenutnog stanja u BHRT-u, u skladu s članom 29. stav (1) tačka k) Zakona o Javnom RTV servisu BiH.

U smislu odredbi člana 113. Poslovnika Predstavničkog doma doma Parlamentarne skupštine BiH, za izvjestioca u plenarnoj fazi imenovan je prvi zamjenik predsjedavajućeg Komisije Šemsudin Mehmedović.

#### **Ad. 5. Tekuća pitanja**

Kako nije bilo pitanja, predsjedavajući je zaključio sjednicu u 12,20 sati.

SEKRETAR KOMISIJE  
Ahmed Jalovičić

PREDSJEDAVAJUĆI KOMISIJE  
dr. Branko Dokić